

IQALUIT ANITITARIYAAT
UVUNGA KANATAMI/AVIKTUQHIMAYUNI/NUNAPTINGNI
QANURILINGANINGINNUT ARNAT MINISTAAT NUNAAQQAQAQHIMAYUNUT ARNANUT

Aullaqtirutaa

Ihumaaluktugut Nunaqaqqaahimayut arnat atuqhimaarmagit inugluguhungniq, maniliurahuarnikkut/inuuhiringnikkut ihariaginiq, imirmik ipirailainniq aangayaarnaqtuniglu, ilaminit ilaminut ningarniq, piqutigiyaa aullakhimapluni ilihariaqturnimut ayuqhautiqarniq, uqauhiminik pitquhiminiglu tammainiq aturunanginnamigit kingulimini qanga, inugiangnirmullu ihuannigittuniglu igluqarniq.

Kangiqlhimayugut avatquhimayaat nappaa miliat Nunaqaqqaahimayut arnat arnarttillu Kanatami, nappariyaa inugiangniata Nunaqaqqaahimayut inuit, una naunaiyainirmit ilihimayut angayukhiit inuit inugiangniayut Kanatami.

Kangiqlhimayugut ilagiiktut ningarnia piqutigillualiqpagaat Nunaqaqqaahimayut inuit. 2004-mi, naunaiyqhimayuq aippaminik ningarniq Nunaqaqqaahimayunik arnanik amigaitqiyarivagaa piata Nunaqaqqaahimayuunngittunut arnanit. Talvalu, inuuhiringniat tamarmik nunaqaqtut avatilingnik ahianiluunniit Nunaqaqqaahimayut arnat ingattautqiat tahapkunangga Nunaqaqqaahimayuunngittunit arnanit Nunaqaqqaahimayuunngittunillu angutinit.

Ilihimayugut Nunaqaqqaahimayut arnat Ukiuqtaqtumi atuqlhimayut amigaitqianik nuliaqtaunirmik ilagiiktullu ningaqtaunianullu ahianit Kanatami atuqpaktaita.

Tammaqtittumayavut ningarniq, itqaumagiplugu, kingullirni 20-ni ukiuni, Aallait Arnat Katutjiqatigiingit Kanatami uqaqpaktut avatquhimayait 500 Nunaqaqqaahimayut arnat inuaqtauhimayut tammaqhimaayulluunniit hamani nunami.

Quyagiyavut ayuiqharviit pigiaqtitautigiyahimayut hivulliuyukhanut qanuriliurutikhat tuniyauhimayut kavamanut ilauyunit 2007-mi Nunaryuami Nunaqaqqaahimayut Arnat Katimaniryuangani, uqautigiplugit aanniaqtuliqiniq, aanniqtailiniq inuuhiringnirlu; aatjikkutautiniq hakugingniqarnirlu; hakukingnia, nalliringnialu nan'ngaringnarnialu Nunaqaqqaahimayut arnat.

Anititariyaat

Ilitariplugu qilamik iharianaqtuq ihuaqhiyaangani inuuhit Nunaqaqqaahimayut arnat aranrutillu, Kanatami, aviktuqhimayuni nunaptingnilu Ministat Munariyait Qanurilinganinginnut Arnat, ilagiiglutik anititariyakhamut akhuurutigiyamingnut ihuaqhiyaangani inuuhiringniq, maniliurnikkut inmiguurniq pitquhikkullu nakuuhiniat Inuit, Métis-lu Aallailu arnat, tamainni nunamingni avatiqaqtuni, Kanatami.

Uvaguupluta Kanatami, aviktuqhimayuni nunaptingnilu Ministat Munariyait Qanurilinganinginnut Arnat, takuyumayugut aannirnaittumik, aanniarnaittumik hakugiktuniglu Nunaqaqqaahimayut nunallaanginnik, tamainni nunamingni avatiqaqtuni, igluqarniq ihumaalungnarnaittumik, iglukhaqarniq akituvallaangittuniglu talvalu arnat pittiaqtaulutik nan'ngariyaulutiglu qanurikaluarluni inuuhiat nunaqarnialuunniit humi.

Pitquyavut Kanatamiutat piyaangani aatjikkutainnik pihimanirnik Nunaqaqqaahimayunut arnanut piyauvaktunik tamainnut arnanut nunaptingni.

Akhuurutigiyavut pinahuaqtait imaa tamaita Nunaqaqqaahimayut arnat, nutaqqat ilagiiktullu pilaariangani aatjikkutainnik inuuhiringnirmut pivagaita aallat Kanatamiutat.

Ukpiriyugut taimaa atuqhimmaaqtayuq qanuriliurutikhaq iharianaqtuq nakuuhittiarangani Nunaqaqqaahimayut arnat aatjikkutarilirniat aallanut Kanatami.

Akhuurutigiyaqqut pitquhikkut nakuuyut arnanut-turaangayut qauyihainiit.

Ilitariyaqqut atuqhimmaarniq tutqikhiyauhimayullu qanuriliurutikhat piyakhariyavut, ilingaiyaqpalliayaangani, nuliarniq ningaqhuni, inugluguhungnirlu Nunaqaqqaahimayunik arnanik. Uvani naunaittiaqhimayumi akhuurutaunirmi, tuhaqattaqatigiingniq talvani tamainni kavamatkunni Nunaqaqqaahimayullu arnat piyauyukhauyuq.

Atuqhimmaarniaqtavut ilihimattiarniat ayunnginniallu Nunaqaqqaahimayut arnat timigiyaillu imaa pinahuaqtavut pittiarlugit piyaangani, ilaupkaiyaangani, ilauqatigiigiangani. Taimailiurluni, nakuutqiyauniaqtuq ilumut paannariigiangani.

Anititariyaqqut akhuurnivut ihuaqhittiarangani inuuhiringniq, maniliurniq pitquhikkullu qanurinniat Nunaqaqqaahimayut arnat. Una akhuurut kangiqhiyauniaqtuq qanuriliurutaitigut atuni kavamapta, iluani inmi kavamaliqinirmimi. Uqariiqtugut havagiaptingni ilauqatigiiglutik Nunaqaqqaahimayut arnat tamainni qanuq Kanatami nuatqatiginngnirmi talvalu akhuurutigiplugu pitquhikkut ihuaqtunik nunallaanut ihuaqhautikhanik pittiaqtat aallataqingit Nunaqaqqaahimayut pitquhiit, nuatqatigiittiarniit ihariagiyaillu.